

COTEENUJUANAANAA JUAN NAAJIONEE

Pueya samiitianijia rupaa

1 ¹Jiya shipinishaacarijijyojua, Jesucristoori quijiajuhuanajaj. Canaari niaara naajiyani, canaa niishitiniuria nijaniya nojuajiniji canaa tojishano, canaa niquishanojuhuaj. Pueyanaa, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiaarijiu-huaj canaa rupuesacari nojuaja. Nojuajaari pueyaracaanu quijia cutara, pa Samiitianijia-jaarihuaj, pueyaracaanu quijia pa quiniurijahuaj, na sequesanoocua pa tiuushacari. ²Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pohuataquiaarini, nojuajaari seetanujuanaa pa Samiitianijia. Canaari quiarijia cuno pueyara-caanu Rishijiajiniji nia pohuataajaanihuaj. Coteenu na Queta quijia jiyocuaaanuuri. Na nuhuaji, canaacua muetaquiaariiri. ³Canaari seetanujuanaa nia pohuataa canaa niquishano-ni, canaa tojishanojuhuaj. Canaa pohuatasanoocua nia tiuushacari, pocua rupuetooreni, taa canaa quiya pa Que Pueyaso rupuesanocuaani, Neyanu Jesucristo rupuesanonio. ⁴Niaa jaara nio naajiojinia canaa sequesano tojiri, niaari seetanujuanaa shuquiriaatia quijiaa quiniutianiya. Canaa jaara niaacuaji tojiriqiani, canaari shuquiri-niutianiyajaacuhaj.

Pueyaso pa cuhuatana

⁵Jesucristocuaajaari nio rupaa canaa niishitioquiaari, canaa nia pohuataani.

Nojuajaari naa canaa sequequiaari:

“Pueyasoori Cuhuatana cutara. Nojuajaari maja ninishiqui quijia quenaaja”. ⁶Naacua-jitij, paa jaara sequereni: “Pueyaso rupueja cutaranijia”, na rupaa pa tojiyaquishacari, paari saaja najuhuana sapojiyani. Paari juhua ninishiqui quijia quiyajaani. ⁷Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacartij, Neyanu Jesucristo nanacaari puetunu sesa pa miishanojuanaa tujuquiaa poojiajiniji.

⁸Paa jaara sequereni: “Janiya sesa miyashijiani”, paari tama pa cuaqueyajaaja sapojiyani naa pa sequesacartij. Majaari Pueyaso rupaa tojjia pa quiniu. ⁹Paa jaara sesa pa miishano pohuatare saniniunijia, Pueyasoori jiyanootio cutara, na jiyanooniuria pajaniya, taa na sequequiaari-cuajani. Poojiajiniji jeequenutaniya puetunu sesa casaajanaari. ¹⁰Paa jaara saniniuuja sequereni: “Maja sesa cua miiniu”, paari Pueyaso jiyateya juhua sapojuarani. Paa jaara naa quirini, majaari seetanujuanaa na rupaa quiniu poojiajinia.

Jesucristo pocuaji tacuna

2 ¹Quiquihuanijyojuanaa cua tojitiare. ²Nio naajia niaaranijia, maja juhuajaniya nia miiniuria sesa. Paa jaara sesa miirini, paacuajaari pa Que Pueyaso shuriucua jittiaa pocuaji Tacunani, na Que Pueyaso na jiyanootiniuria pajaniya.

Nojuajaari Jesucristo, pueyaracaanu maninia miijia cutarani. ²Sesa pa miishanoori jiyanooshaaquiaa Jesucristo cusonuucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniaa sesa miishanojuanaari jiyanooshaaquiaajuhuj.

³Paa jaara pa Jiyaniijia rootasano tojirini, paari niishiyani paa tari Pueyaso niishirii cutarani. ⁴Jesu rootasano tojiyashijia jaara sequeriquia: “Pueyaso niishiyaniijia”, jiyano pueyanoori sapojoua. Majaari na jitianu Pueyaso rupaa noojiajinia. ⁵Cante saniniuujia pa Jiyaniijia sequesano tojjia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqui quiya natani. ⁶Cante sequejani: “Janiyari Pueyaso rupuejani”, nojuaja cuara quiiria juhua Jesucristo, taa na quiquiaari maniniacuaani, mijiria na quishacari.

Quiarinio Pueyaso rootasano pajaniyara

⁷Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuajaari tariucuaaanu nia tojishano, majaari quiarinio. Niaacuajaari tari na tojiquiaari, Pueyaso rupaa jaara shushajanaa nia niquiara pohuatasaaquiaari. ⁸Naajaa, nio rootasano quiarjia cua naajiosanoni, nioori seetanujuanaa juhua quiarinio niaara. Niaari tari na tojiquiaa, pueya panijia nia quishacari, taa Jesucristo quiquiaari pueya panijiacuaani mijiria na quishacari. Na rootasano nia tojishacari, niniquiaari tari quiamacuaa nioojiajiniji. Pueyasoori nioojiajinia cuhuataa nia panitioosacari quiarjia.

⁹Niaa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niquiniu paniniu niarta Pueyaso pueyano,

niaari ninishiqui quiyajaa. ¹⁰Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuhuj, tama nojuajaarijia maja sesa na miiniu quiniutianiya, pueya panijia na quishacari. ¹¹Cante narta Pueyaso pueya niquiniu paniyashijiani, cuno pueyanoori ninishiqui quiyajaa, juhua ninishiqui canujuucuaajaariuhuj. Majaari na niishiniu tee na quiaani. Naa na quiniucua juhua ninishiquitij, nojuajaari juhua cariyouaru quiya. Majaari na niishiniu Pueyaso casaa.

¹²Quiquiohuaniyojuanaa, niaara naajiyani nionijia, Pueyaso jiyanooshano muerasu nia quiniucua, Neyanu Jesucristo mosaanuucua pocuara.

¹³Queyanaa, niaara naajiyani nia niishiniuucua pueyaracaanu Quijia, cante tari pocuaji quiquiaari jiya coteyaquishacarijiajani. Mashiquioriniaa, janiya niaara naajiyajaniuhua cua timishacari nia shocotanuucua Sesaaca.

Janiyari niaara naajiocanuni quiquiohuanaa, nia niishiniuucua pa Que Pueyaso, Neyanu Jesucristoocua nia tiuushacari. ¹⁴Janiyari niaara naajiocanujuhua queyanaa, nia tiuuniucua tariucua pocuaji Quijiaacua, nio jiya coteyaquishacarijia. Janiyari niaara naajiocanujuhuj mashiquioriniaa, seetanujuanaa maninia nia tojinuucua Pueyaso rupaa, niaa jaara na masequiaari nioojiajinia, Sesaaca nia shocotanuucua-juhuj.

¹⁵Majaari mijiria sesa miiniuucua nia jiaatianu, mijiria casamiucuanio. Cante mijiria casaacua jiaatiajani, cunoori maja pa Que Pueyaso panijia. ¹⁶Mijiria niishijia coretanijosano tama nojori niishishanojinijiajani, puetunu cunojuanaari maja pa Que Pueyaso niishitishano. Cunoori sacuraatia tama mijiria pueya niishishanojuaja. Naacua-

jitij, pueyano pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuquiritiniuriajaaja. Paari pa niquishano pa maniniucasano casaa paniquiaa pueyaracaanuni. Naajuhuj, paari pueyaracaanu timiquiaani tamasaca timitiasacari pajaniya. Puetunu naa sacuaraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. ¹⁷Nio jiyari tari tariucashiyaree. Socua shaajasaanutaniya puetunujuanaari. Puetunu sesa pa jiaatianujuanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

Jesucristo paraa

¹⁸Quiquiohuanaa, quiarijiaari quera jiya puequesacari tari. Niaacuajaari tari pohuatasaquiaari Cristo Paracaari niniutianiya. Quiarijiani, queraatia na paraari tari supueree. Naacuajitij, paari niishiyani nio pa quishacariiri jiya puequesacari quera. ¹⁹Cuno Cristo paraani, nojoriiri pajaniyajinijinio pueya quiquianucuaaja. Pocuaji rupatetucanuuri maja seetanujuanaa Pueyaso muerasu nojori quishacari. Jaara seetanujuanaa Pueyaso muerasu quiquianu, mariqui pata quiyacuaateni. Naa nojori miiniucuatej, paari niishiyani majaari puetunu pata rerejonaajanaa seetanujuanaa parta Pueyaso muerasu.

²⁰Saniniuuja niajaniya Pueyaso muerasunaa, Jesucristoori nia niquitioquiaari na Sohanu. Naaratej puetunu niajanijajanaari Pueyaso niishitijaraca. ²¹Majaari niaacuara cua naajonuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhuj, sapojoua sequesanoori maja Pueyasojiniji.

²²Pueyano jaara sequere: “Jesuuri maja Pueyaso Jiyarosano”, cunoori sapojoua. Cante sequejani: “Pueyasoori maja Jesu Que”, cunocuaajaari Cristo paraca. Jaara sequerejuhuaj: “Jesuuri maja Pueyaso Niyanu”, cunoori Cristo paracajuhuj. ²³Cante Pueyaso Niyanu Cristo tamacajani, majaari Pueyaso na jitianu na Querajuhuj. Cante Pueyaso Niyanu Cristo jitiaa cutarani, pa Que Pueyaso jitiaa na Querajariuhuj.

²⁴Naaratej, Pueyaso rupaa nia racatare nia numaama taa nia tojiquiaari tariucacaanucujani jaara shushajanaa pohuatasaquiaari nia niquiara. Niaa jaara naa racatariquia na rupaa nioojijianiate, seetanujuanaa nocua nia tiuushacari, niaari jatiqui quiya pa Que Pueyasota, Neyanu Jesucristotanio. ²⁵Jesucristocuaajaari na Sohanu niquitioquiaari pajaniya, pueyaracaanu pa rishiniuria. Nojuajanaari naa pa sequequiaari.

²⁶Nio naajioree niaaranijia cua niishitiniuria niajaniya, nia niishiniuria taa Jesu paraa niishitiojonuuquiaa sesa najuhua na cuaracashiniuniutiani. ²⁷¿Casaara nojori nia tojiquiaani? Niaacuajaruhua tari Pueyaso Sohanu jitiaa, Jesucristo niquitiosano niajanijiani. Naacuajitij, majaari tari panishaanu tamasaca niishitiojonura socua niajaniya. Pueyaso Sohanucuaajaari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jatiqui nia quiriquia Jesucristota, taa Pueyaso Sohanu niishitiojoquiaa nia quiniuriacuajani.

²⁸Quiarijiani quiquiohuaniyojuanaa, jatiqui nia quiri Cristota, seetanujuanaa juhuajaniya nia quiniuria pa Jiyaniijia jaara tiuquiriohua pocua. Naa nia quiritij maja nia caririquiniuria nojuaja jaara pa jitiashuhua. Na rupaa tojiyashijiaacari

caririquiniutianiya cutara. ²⁹Niaacuajaari seetanujuanaa niishiya, Jesucristoori tojetaarucuajanaa sesa miyashijia cutara. Niaa cumaati niishiyajuhua, puetunu maninia miijiacajanaari Pueyaso muerasu.

Pueyaso muerasu

3 ¹Pueyanaa, pa Que Pueyasoori jiyanoehua pa panijia. Pa sequeyari, “cua niquiouhua”. Seetanujuanaa, paari necohuani. Naaratej, majaari mijiria quiniaa pueya niishiniu pajaniya. Pa niishitiyuaquiyari nojori niishiyaquiniuu-cua pa Que Pueyaso. ²Cua panishano Pueyaso muerasunaa, paari tari Pueyaso muerasucujani. Maja cutaraari pa niishiniu taamuecaquitijia pa quiniutianiya na nuhuajitijaj. Paari saaja niishiya cutarani, Jesucristo jaara nimiohua, paari juhua nojuaja quiniutianiya. Na tiuquishacariuhua, paari na niqiniutianiya ni taa na quiyacujani. ³Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucuajanaa.

⁴Cante sesa miijiani, cunoori Pueyaso rootasano na rupaajinia tojiyaquijia. Puetunu sesa miinijianaari Pueyaso rootasano tojiyaquiniu. ⁵Niaari niishiyajuhua, Jesuuri mijiria pocua niqiaari poojia seque na jataniniuria. Nojuajaari tojetaarucuajanaa sesa miyashijia cutara. ⁶Naacuajitij, cante jatiqui quiya pa Jiyaniijatani, nojuajaari maja sesa na miiniu quiquiaa cutara. Cante saniniuujia sesa miijiani, majaari na niishiniu Jesu. Majaari nojuaja na niqiniu quiquiaarijiuhua. ⁷Quiquiouhuaniojuanaa, tama nia cuaqueyajaaja nia cojuare niaa mariqui sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani,

pueyaracaanu maninia quijia cutara.

⁸Saniniuujia, cante sesa miijiani, nojuajaari Sesaaca pueyano. Shusha jiya coteenujiniji, Sesaacuajaaari tari sesa miijia quiquiaari. Pueyaso Niyanuuri cunora niqiaari puetunu sesa na miijiosanojuanaa na shaajanura.

⁹Puetunu Pueyaso pueyajanaari maja sesa miiniuucua na shiiniuquiniuni, quiarinio pueyara Pueyaso rootasano nojori quiniucua. Nojoriiri quiarinio pueyara jatanishano quiya Pueyaso Sohanu nojori jitiiasacari. Naacuajitij, seetanujuanaa Pueyaso muerasu nojori quishacari, majaari na naata sesa miijiaa nojori quiniu pueyaracaanu. ¹⁰Naacuajitij, maatia niishishanocujaaari cante Pueyaso muerasuni. Saniniuujia, cante maninia miyashijiani, nojuajaari maja Pueyaso pueyano. Naajuhua, cante narta pueya paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhua.

Panitiojuaca pa quirij

¹¹Pueyanaa, shushajanaa Pueyaso rupaa nia tojishacari, niaacuajaari naa niishitiojosaaquiaaritij: “Panitiojuaca nia quiri”. ¹²iMaja cutaraari pa quiniu juhua Cañ! Nojuajaari tama tarajanujaaaja moquiaari, Sesaaca tojijia na quiniucua. Nia niishiritio casaara Cañ moquiaari tarajanuni. Nojuajaari tama tarajanujaaaja tacartaquiaari monu, tarajanu miishano quiniucua maninia. Saniniuujia, tama na miishanojuaarjia sesa quiquiaari. Cunora tarajanu moquiaariiri.

¹³Cuarta Pueyaso muerasunaa, majaari nia jiyajenenu Pueyaso ruuretajaca jaara niqiniu panyaquiriquia niajaniani.

¹⁴Paacuajaari juhua macu samiitianijio-saaquiaarihuani, seetanujuanaa saminiucua pa quiniuria. Paari seetanu-

juanaa na niishiyani panitiojuaca pa quishacari parta Pueyaso pueyata. Cante tapueyocuaca paniyaquijiani, nojuajaari juhua macu quiyajaa. ¹⁵Naajuhuj, narta pueyano niquiniu paniyashijiacani, nojuajaari juhua pueya mojua Pueyasora. Niaacuajaari niishiya, pueyano mojujaari Pueyaso samiitianiyaquishoojua pueyaraaanu na rishiniuria. ¹⁶Paacuajaari niishiyani, Cristoori jiyanojua pa panijia na cusonuucua pocuara. Naacuajiti paari niishiyani taamuecate seetanujuaana paniniuni. Paa cuara naa panijia quiirijuhuj, tama pa cuaqueyajaaja pa tarinitianura parta Pueyaso pueyacuara, jiyanojua pa paniniutia nojori. ¹⁷Niaa jaara nareja niquiya niarta Pueyaso pueya casamijuniucua, puetunu nia panishanojuanaa nia jitiiasacaricuua, niaari najuhuaana sequeya: “Pueyaso panijianijia”. ¿Pueyaso panijia pueyano-teeri jiyano pueyano, narta Pueyaso muerasu niquitioyaquijia na jitiiasanojiniji? ¡Maja! ¹⁸Quiquihuanijoyuanaa, majaari najuhuaana pa sequenu: “Cuarta Pueyaso pueya panijianijia”. Paa jaara seetanujuaana nojori panirini, nojoriicua pa taraajere, taraatia nojori miishacari. Pueyaracaanu maninia pa miiri, seetanujuaana pa paniniutia pueya. Majaari najuhuaana pa sequenu: “Nojori paniyanijia”.

**Pueyaso tojjiaari juhujaniya quijia
Pueyaso niquiara**

¹⁹Naacuajitij, paa jaara pueya panijia quirini, paari niishiyani paa seetanujuaana Pueyaso tojjiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya. ²⁰Pueyaso muerasu pa quishacari, poojia jaara pa taacanuutere saaja nocuaji, naajaa, Pueyaso cutaraari jiyanojua maninia niishijia socua poojia niishishanojiniji. Nojuacuajaari pa niishiya cutara.

²¹Cua panishano Pueyaso muerasunaa, poojia jaara pa macuhuaajaquiri, paari shuquiriaatia quiya Pueyaso niquiarani. ²²Nojuajaari puetunu pa masesano niquitionutianiya pajaniya, na rupaa pa tojjishacari, puetunu na panishanojuanaa pa miishacarijuhuaj. ²³Pueyaso sequesano puerari nio: Neyanu Jesucristoocua pa tiuuniuria, pa panitioonurajuhuj taa na sequequiaaricujani. ²⁴Canapute Pueyaso rootasano tojjiacani, nojoriiri Pueyasota rupuetootesano quijia. Naajuhuj, Pueyasoori nojorijinia quiyacujua. Nojuacuajaari na Sohuanu niquitioquiaari pajaniya. Naa na Sohuanu pa jitiiasacaritij, paari maatia niishiyani Pueyasoori poojiajinia quiya.

**Pueyaso Sohuanujiniji pohuatasano, Cristo
Paraca sohuanujinijinio**

4 ¹Cuarta Pueyaso pueyanaa, quiarijiani, queraatia Pueyaso sequenu panishano caminiujuniana pueyari supueya. Majaari ritia nia tiuuniu puetunu nojoriicujanaa. Coteenu nojori nia saniniujiuri, nia niishiniuria nojori caminiujiushanote seetanujuaana Pueyaso Sohuanujiniji, tamonujiniji soj. Mijiria, queraatia sapojonuujuacaari caneya. Nojoriiri najuhuaana cuaracashiniuya na sequesacari: “Janiyacuajaari Pueyaso sequenu panishano caminiujuniani: Pueyaso Sohuanu niishitishano janiya”. ²Niaari naa niishiniutianiya cante seetanujuaana Pueyaso Sohuanu niishitishano caminiujuniani: Pueyaso Sohuanu jiitiajaari naa sequeja: “Pueyaso jiyarosano Jesucristoori pueyanora quiquiaari, mijiria pocuara cusoriquiano”. ³Cante saniniujia jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jiitanu. Saaja Sesaaca sohuanu jiitiaa noojiajinia cutaraari. Nojuacuajaari Jesucristo Paraca. Niaacuajaari tari pohuatasaa-

quiaari, Cristo Paraca sohuanuuri niniutianiya. Nojuacuajaari tari mijiria quiya.

⁴Quiquiohuaniojuanaa, niaacuajaari Pueyaso muerasu. Naacuajitij, niaari cuno sapojonuujuaca shocotacanu Pueyaso cumaacata. Nioojiajinia Quijiaari socua cumaacaraca nojori jiiatiasano Sesaaca cumaacajiniji. ⁵Cuno sapojonuujuacaari saaja Pueyaso niishiyashijiaca, maja Pueyaso muerasu. Naacuajitij, nojoriiri saaja mijiria casaajiniji pohuata-nuuquiaa. Naarate narta Pueyaso ruuretajacaari nojori tojitiaquiaa. ⁶Paa cutaraari Pueyaso pueyani. Naacuajitij, cante Pueyaso tojitiyacani, nojoriiri pa tojitiaquiaa. Canapuate saniniuujia maja Pueyaso pueyani, nojoriiri maja na tojitianu quiquiaa pajaniya. Naacuajitij, pa naata niishiniu cante seetanujuanaa Pueyaso Sohuanu jiiitiaa cutarani, cante saniniuujia sapojoua sohuanu jiiitaanijia.

Pueyaso pa panijia cutara

⁷Cua panishano Pueyaso pueyanaa, jiyanhua panitioojuaca pa quirij. Pueyasocujaari pa panijia. Nojuajaari pa panitijia na Sohuanuta, jiyanhua panijia pa quiniuriajuhuaj. Canapuate puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaarihuaj. ⁸Canapuate pueya paniyashijiacani, nojoriiri maja na niishiniu Pueyaso. Pueyasocujaari panijia cutara. ⁹Nojuajaari pa niishitiquiaari taa na paniquiaa jiyanhua pajaniyani, Neyanuniyojua na jiyarosacari mijiria pa samiitianijiori-quiano, pocuara na cusosacari. ¹⁰Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaa-riiri pocuara mosocoriquiano, sesa pa

miishano jiyanooshaanura. Naa cutarate seetanujuanaa paniniuni.

¹¹Cua panishano Pueyaso muerasunaa, Pueyaso jaara naa pa paniquiaaricuaa, ¿casaara pa panitioyaquiuarinijia? Naa panitioojuacara pa quirijihuaj. ¹²Majaari quenaaja pa niqiniu quiquiaari Pueyaso, taamuecatejanononi. Naajaa, paa jaara tamacata panitioojuaca quirini, Pueyasoori poojiajinia quiyacuaja. Naacuajitij, paari tojetaarucujanaa panijiacara quiniutianiyan, na paniniuni quishacari poojiajinia. ¹³Nojuajaari na Sohuanu pa niqitioquiaari poojiajinia na quiniuria. Naacuajitij, paari niishiyani paacuajaari nata rupuetoojua quiyani. ¹⁴Canaajanaari seetanujuanaa canaa niquishano pohuataani: Pueyasoori Neyanu jiyaroquiaari mijiria, mijiria quiniaa niti mosocoriquiano, nocua tiuujiaca jiyatesaanura Pueyaso pueyara. ¹⁵Cante pueya niqiuara sequejani: “Jesuuri seetanujuanaa Pueyaso Niyanu”, Pueyasoori noojiajinia quiya. Nojuajaari Pueyasota rupuetoojua quiyajuahuaj.

¹⁶Naacuajitij, paari niishiyani Pueyasoori jiyanhua pa panijia. Paari na niishiyajaaniuhua na rupaacua pa tiuushacari. Pueyaso cutaraari panijia. Paa jaara pueyaracaanu panijia quirini, paari seetanujuanaa Pueyaso rupuejani. Naajuhuaj, Pueyasoori poojiajinia quiya. ¹⁷Naa Pueyaso quishacari poojiajinatej, paari pueya panijia jiyacatequiaa socuani. Naa seetanujuanaa panijia pa quishacaritij, paari juhuajaniya quiniutianiya Pueyaso nequesoreesacari puetunu pueyapuejanaani. Majaari pa puerenu quiniutianiya panijia pa quishacari taa panijia nojuaja quiyacuani. ¹⁸Cante seetanujuanaa Pueyaso panijiani, majaari na niishiniu puerenu. Naa pa paniniuni puetunu pa puerenu jataajanaa. Cante puereja quiya saniniunijia, majaari juhuanojuaja na paniniuni Pueyaso

puetunu noojiatajanaa. Puerejaari niishiriojiya: “Saniiitosaanutaniyanijia”.

¹⁹Niaacuajaari niishiya, Pueyasoori coteenujuanaa pa paniquiaari, naarate paari saniniuujia na paniyani.

²⁰Saniniuujia, cante sequejani: “Janiyari Pueyaso panijiani”, narta pueya niqiniu paniyaquiya saajaraarihuaj, jiyano pueyanoori sapojoua. Naa na paniyaquishacari tarajanu na niquishano na namijiata cutaratej, ¿maatucua taa Pueyaso panirini, na niquishoo socuani? ²¹Pueyasocujaari naa pa rootaquiiaari: “Cante cua panijiani, cuaara paniiria narta pueyajuhuj”.

Taa pa shocotanutaniya mijiria niishishanoni

5 ¹Niaa jaara Jesuucua tiuuri nojuaja seetanujuanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua paniyajaarihuaj. ²Naacuajitij, pa panishacari Pueyaso, pa tojishacari na rootasanojuhuaj, jiyacariti paari niishiyan paari parta Pueyaso muerasu paniyajaacuhuj. ³Paa jaara Pueyaso panijia quiri seetanujuanaani, paari na sequesano tojjijaca quiyajaanihuaj. Na rootasano pajaniyani, majaari jiyajeneta na quiniu pajaniyara. ⁴Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasocua pa tiushacari. ⁵Cante Jesu jiyateya seetanujuanaa Pueyaso Niyanurani, saaja jiyano pueyano na naata mijiria niishishano shocotanu cutara.

Pueyaso Niyanujiniji pohuatasano

⁶Pueyasoori canaa niishitiquiaari Jesuuri seetanujuanaa Neyanujuhanajaj, Jesu jaara moojinia tiuquinishaaquiaari. Canaa niishitiquiaarijaarihuaj Neyanu jaara niyacutesanojinia naatequiaari.

Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhuj, janiyajanaari na niquiquiaari na nanaca shooteyano na shuucujini. Naajuhuj, poojiajinia quijia Pueyaso Sohanuuri pa niishitiquiaa cunoori seetanujuanaa Pueyaso Niyanu quijiajuhanajaj. Pueyaso Sohanu cutaraari maja na niishiniu sapojonu.

⁷Jiuujianaraca jiyocuaaanu quijiacari pa niishitiya Jesucristoori mijiria niquiaari pueyano na quiniuria seetanujuanaa. Cuno pojoriiri nio: Pueyasojuanaa, na Rupaa, na Sohanunio. Nio jiuujianaraca quijiacani, nojoriiri Pueyasojuhanajaj. ⁸Paari mijiria jiitiaa Jesujiniji pa niishitijiacajuhuj. Cunoori jiuujianaraca quiyajuhuj. Cuno pojoriiri nio: poojiajinia quijia Pueyaso Sohanu,

jiyocuaaanu tojishano rupaa Jesu tiuquinishacari moojinia, naajuhuj, na nanaca, pueya niquishano na shuucujaji shoyano. Puetunu cunojuaanaari mariyata pa niishitiya Jesuuri seetanujuanaa Pueyaso Niyanu. ⁹Paa jaara tojiriquia pueya pohuatanuusanoni, ¿casaara sanya Pueyaso sequesano pa tojijaquiyarini? Pueyaso sequesano Neyanujinijiiri socua seetanu rupajanaa cutara pueya pohuatanuusanoiniji. ¹⁰Cante Pueyaso Niyanuucua tiuujiani, Pueyaso Sohanuuri noojiajinia na niishitiya Jesuuri seetanujuanaa Pueyaso Niyanu. Saniniuujia, cante Pueyaso sequesano Neyanujiniji ruuretaja saniniunijia, nojuajaari Pueyaso jiyateya sapojuara, na tiyuaquishacari tama Pueyaso sequesanoocujaaja Neyanujiniji. ¹¹Pueyasocujaari sequequiaari, Neyanuucua tiuujiacari pueyaracaanu rishijiaa quiniutianiya.

¹²Cante Pueyaso Niyanu jiitiaa noojiajiniani, nojuajaari tari samiitianishaarohua pueyaracaanu rishijia na quiniuria. Pueyaso Niyanu jiitiaashijiaari saniniuujia maja na rishiniu quiniutianiya.

Nio naajio puequenu panishacari rootasano

¹³Nio naajiya niaaranijia nia niishiniuria, Pueyaso Niyanuucua nia tiuushacari niaari tari samiitianijiosaarohua pueyaraanu nia rishiniuria.

¹⁴Paari Pueyasocua tiuquiaani, pa niishishacari nojuajaari pa tojiquiaa pa secojosacari nojuaja, pa masesano jaara quiri taa na paniyacujani. ¹⁵Naatej, taa pa niishiyacuaani Pueyasoori pa secojosano tojiquiaa, paari naa niishiyajuhuj paari nojuaja pa masesano maseree tarini.

¹⁶Cante narta Pueyaso pueyano niquiya sesa miyanoni, cuara Pueyaso secojoora nocuara, sesa na miishano jaara na cusojaashijia quiri. Naacuajitij, Pueyasoori cuno sesa mijia naataniniutianihua, sesa na miishano jaara cusojaashijia quiri. Quiyajaariuhua tamonu sesa casaa miiniu. Paa jaara cuno sesa casaa miirini, paari cusoqueeni. Naa cua sequesacari nijaniyatej, majaari cua sequenu nijaniya nia secojonura jiyano sesa miishanoocuaratej. ¹⁷Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

¹⁸Paacuajaari niishiyani pueyanaa, cante Pueyaso jiitaa juhua na Que cutarani, nojuajaari sesa miyaquiquiaa, Pueyaso Niyanu cojuasacari nojuaja. Naacuajitij, Sesaacaari maja na naata sesa na miitiniu. Majaari na naata sesa na miiniujuhuaj.

¹⁹Paari niishiyani paa cutaraari Pueyaso muerasuni. Sesaacaari saniniujia puetunu mijiria quiniaa Pueyaso niishiyashijiacajanaa jiitiaacujua. Nojuajaari nio jiya camarnu.

²⁰Paari niishiyajuhuj Pueyaso Niyanuuri mijiria pocua niquiaari. Nojuajaari na niishitiaja niquitioquiaari pajaniya, maninia pa niishiniuria na Que, na Que quiniuria pa Quejuhuaj. Nojuajaari Pueyasojuanaa cutara. Paari nata quiya jatiquini, Neyanu Jesucristo-ta pa rupuetosacari. Nojuajaari Pueyasojuhanajaj, pa Samiitianijiajariuhuj, pueyaracaanu rishijia pa quiniuria. ²¹Quiquihuaniojuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniji. Paa jaara tamonu casaacua jiaatiareni, paari Pueyaso shocoteya nocuarani. Niojuanaa pueyanaa. Tariucujaja.